

外科心法

外科心法卷之四

薛氏醫按

吳郡薛 已著

新都吳玄有校

瘡瘍作渴

開化吾進士年三十面患瘡已潰作渴自服托裡及
降火藥不應予診其脉浮而弱丹溪云潰瘍作渴屬
氣血俱虛況脉浮弱投以參耆各三錢歸朮熟地各
二錢數服渴止又以八珍湯加黃耆數劑脉斂而愈
予治瘡瘍作渴不問腫潰但脉數發熱而渴以竹葉
黃耆湯治之脉不數不發熱或脉數無力而渴或口

乾以補中益氣湯若脉數而便秘以清涼飲天脉洪
天按之無力而渴以加減八味丸並効若治口燥舌
黃飲水不歇此丸尤効

一男子渴後背發疽未潰脉數無力此陰虛火動用
加減八味丸呔咀二劑稍緩次用丸劑而愈葉司訓
腦患疽亦作渴脉雖洪按之無力以此藥治之不信
自用滋陰等藥愈甚七惡併至而歿精要云患疽之
人雖云有熱皆因虛而得之愈後發渴及先渴而後
疽非加減八味丸不能治

一男子年踰五十一歲患毒瘡口不合右關脉數而

渴此胃火所致用竹葉黃芪湯遂止再用補氣藥而愈嘗治午後發渴或發熱用地骨皮散亦効

一男子患痔漏口乾胃脉弱此中氣不足津液短少不能上潤而然以黃芪六一湯七味白朮散治之或曰諸痛痒瘡皆屬心火遂服苦寒之藥大便不禁而效夫諸痛痒瘡皆屬心火言其常也始熱終寒則反常矣可泥此而不察乎

李氏論人病疽多有愈後發渴而不救者治之惟加減八味丸最妙疽安而渴者服此丸則渴止疽安而未渴者預服此丸則永不生渴氣血加壯或未發疽

而先發渴者服此不惟渴止疽亦不作又云一貴人
病疽未安而渴作一日飲水數升予以加減八味丸
治之諸醫大笑云此能止渴我輩當不復業醫皆用
木瓜紫蘇烏梅人參茯苓百藥煎等劑服多而渴愈
甚不得已用此藥三日渴止久服遂不復渴飲食加
倍健於少壯蓋此藥非出鄙見自爲兒時聞先君言
有人病渴用渴藥累年不愈一名醫使服此藥不半
年而愈其疾本以腎水枯竭不能制火心火上炎是
以生渴此藥降火爲最降心火生腎水親用之嘗驗
患者當知所鑒

詳見外科精要

瘡瘍便秘

傅允承母年踰七十腰生一瘤作痒異常疑虫蟻所
毒診脉浮數齊氏云浮數之脉而反惡寒瘡疽之謂
也又云外如麻裏如瓜疽毒在內翌日復診脉乃弱
予謂未潰而脉先弱何以收斂况大便不通則真氣
已竭治之無功其子固請不得已用六君子湯加藿
香神曲飲食漸進大便始通更用峻補之劑潰而膿
清作渴再用參芪當歸熟地黃麥門冬五味子而渴
止允承喜曰吾母可無虞矣予謂不然不能收斂先
入之言也彼疑遂速他醫果不起

浙江俞上舍年五十患癰將痊大便閉澀服芩連等藥反廢飲食予用益氣血之劑加桃仁蘇仁亦未効更以豬胆汁一碗納谷道始効更以養血氣藥而平原病式云諸澀枯涸皆屬於燥燥者火之氣病後血衰故大便閉澀宜以辛甘之藥潤之如用寒苦之藥則胃氣伐矣若老弱或產後而便難者皆氣血虛也胆汁最効尋常上部枯燥者以酒調服亦佳

膿熟開遲

蘇州施三守悌項下患毒膿已成因畏針歛延至胸赤如霞其脉滑數飲食不進月餘不寐甚倦予密針

之膿出卽睡覺而思食用托裏藥兩月餘而愈又一人患此及時針刺數日而愈劉璽素虛患此不針潰透頤頰氣血愈虛竟不救

廣東王上舍患附骨癰畏針不開臀膝通潰脉數發渴煩燥時嗽飲食少思齊氏曰瘡瘍煩燥時嗽腹痛渴甚或瀉利無度或小便如淋此惡證也膿出之後若脉洪數難治微濇遲緩易治遂刺之膿出四五碗許卽服大劑參芪歸朮翌日脉稍斂更以八珍湯加五味麥門肉桂白斂三十餘劑脉緩膿稠三月而愈王太守宜人患發背膿熟不開昏悶不食此毒入內

也斷不治強之針膿碗許稍蘇須臾竟亡大抵血氣壯實膿自湧出老弱之人氣血枯槁必須迎而奪之順而取之若毒結四肢砭刺少緩腐潰深大亦難收歟痛結於頰項胃腹緊要之地不問壯弱急宜針刺否則難治

梁閣老孫甫周歲項患胎毒予俟其有膿刺之膿出碗許乳食如常用托裏藥月餘而愈靳閣老子亦患此待膿自出幾至不救吾鄉徐內翰子患痘毒及時針刺毒不內侵數日而愈大抵古人制法淺宜砭而深宜刺使瘀血去於毒聚之始則易消況小兒氣血

又弱膿成而不針破鮮不斃矣

一老人腿患附骨疽腫硬大按方痛口乾脉弱腫聚不潰飲食少思予謂腫下而堅者發於筋骨皮色不變者發於骨髓遂以參耆等藥托之三十餘劑膿雖熟不穿予謂藥力難達必須針刺不聽至旬日方刺之湧出清膿五六碗許然衰老之人氣血不足養毒又久竟不治大抵瘡疽旬日不退宜托之有膿刺之有腐肉取之虛則補之此十全之功也

滕千兵年踰五十臀患癰膿熟不開攻通大肛膿從大便而出予辨不能治果斃丹溪云臀居小腹之後

陰中之陰也道遠位僻血亦罕周中年後尤慮患此
沉膿成不刺欲不亾得乎

腐肉去遲

鄭揮使年踰五十患發背形證俱虛用托裏藥而潰
但有腐肉當去彼懼不肯延至旬日則好肉皆敗矣
雖投大劑毒甚竟不救古人謂壞肉惡於狼虎毒於
蜂螫緩去之則戕賊性命信哉

陰證似陽

舉人潘光甫年踰四十患腦疽腫焮診其脉沉靜予
謂此陽證陰脉斷不起已而果然蓋瘡疽之證雖屬

心火亢當分表裏虛實果元氣充實內有實火者寒劑或可責効若寒涼過度使胃寒脾弱陽證變陰或結而不潰或潰而不斂陰陽乖戾水火交爭死無日矣

陽瘡似陰

太監劉關惠發背予奉旨往治腫痛色紫診其脉息沉數陳良甫云脉數發熱而痛者發於陽也且瘡瘍赤甚則紫卽火極似水也詢之嘗服透骨丹半載乃積溫成熟所致遂以內疎黃連湯再服稍平更用排膿消毒藥及猪蹄湯太乙膏而愈經曰色與脉當

相參應治之者在明亢害承制之理陰陽變化之機焉耳

用藥生肌

姑蘇黃汝耘年踰五十患發背用生肌藥太早背竟腐潰更泄瀉脉微緩予以二神丸先止其瀉次以大補藥治之用猪蹄湯洗淨以黃耆末填滿患處乃用膏藥喜其初起時曾用蒜多灸故毒不內攻兩月而愈

許序班患發背十餘日瘡頭如粟許腫硬木悶肉色不變寒熱拘急脉沉實此毒在內也先以黃連內疎

湯次用消毒托裏藥其毒始發奈欲速急用生肌劑
患處忽若負重身如火燋後竟不起東垣云毒氣未
盡不可用生肌藥縱得平復必再發若毒氣入腹十
死八九大抵毒氣盡脾氣壯則肌肉自生生肌藥可
弗用矣

瘡毒入內

張宜人年踰六十患發背三日肉色不變頭如粟許
肩背加重寒熱飲冷脉洪數陳良甫云外如麻裏如
瓜齊氏云增寒壯熱所患必深又云肉色不變發于
內也予以人參敗毒散二劑及隔蒜灸五十餘壯毒

始發背始輕再用托裏藥漸潰顧氣血虛甚而作渴
參耆當歸熟地等藥渴亦止彼欲速自用草藥罨患
處毒氣復入遂不救嘗見老弱者患此瘡頭不起或
堅如牛領之皮多不待潰而死有潰後氣血不能培
養者亦死凡瘡初潰毒正發越宜用膏藥吸之參耆
等藥托之若反以藥遏之使毒氣內攻者必不救
智化寺一僧患瘡疥自用雄黃艾葉等藥燃于被中
薰之翌日遍身焮腫皮破水出飲食不入予授以解
藥不應而歿蓋藥毒薰入腹內而散真氣其禍如此

喉閉

附諸骨鯁并稻麥芒在
喉及誤吞金銀銅錢

莆田史侍御患喉閉以防風通聖散治之腫不能嚥
予謂此症須針乃可奈牙關已閉遂刺少商穴出血
口卽開更以膽礬吹患處吐痰二碗許仍按前藥而
愈嘗見患此疾者畏針不刺多斃少商穴在手大指
內側去爪甲如韭

葉許

于縣尹喉閉腫痛寒熱脉洪數此少陰心火少陽相
火二經爲病其證最惡惟刺患處出血爲上因彼畏
針先以涼膈散服之藥從鼻出急乃願刺則牙關已
緊不可針遂刺少商二穴以手勒去黑血口卽開仍
刺喉間治以前藥及金鑰匙吹之頓退又以人參敗

毒散加芩連玄參牛蒡子四劑而平經曰火鬱發之
謂發汗出血乃發汗之一端也河間云治喉閉之火
與救火同不容少怠常見喉閉不去血喉風不去痰
以至不救者多矣每治咽喉腫痛或生瘡毒以荊防
敗毒散加芩連重者用防風通聖散並效

杜舉人咽喉腫痛口舌生瘡先以清咽消毒散二服
更以玄參升麻湯而愈

一男子年三十餘口舌常破如無皮狀或咽喉作病
服清咽利膈散愈甚予以理中湯治之而愈

聘士王文遠咽喉腫痛口舌生瘡勞而愈盛以補中